

## ERINDISBRÉF

### *Fjölmenningarráðs*

#### **Stjórnskipuleg staða**

Fjölmenningarráð Sveitarfélagsins Hornafjarðar heyrir undir velferðarnefnd Sveitarfélagsins Hornafjarðar. Starfsmaður ráðsins er verkefnastjóri fjölmenningar.

#### **Skipan, seturéttur á fundum og áheyrnaraðild**

Í fjölmenningarráði eiga sæti fimm fulltrúar, tveir kosnir af bæjarstjórn að afloknum sveitarstjórnarkosningum skv. ákvæðum *sveitarstjórnarlaga nr. 138/2011, laga um félagsþjónustu sveitarfélaga nr. 40/1991 og laga um málefni aldraðra nr. 125/1999.*

Bæjarstjórn kys tvo fulltrúa að afloknum kosningum. Þrír fulltrúar eru tilnefndir úr samfélaginu af verkefnastjóra fjölmenningar, þvert á atvinnulíf, fræðslu- og frístundamál og velferðarmál. Þeir íbúar sem tilnefndir eru skulu vera innflytjendur.

Fjölmenningarráð sjálf kys sér formann og varaformann og hverjum aðalmanni er jafnframt kosinn/tilnefndur varamaður.

Kjörtímabil fjölmenningarráðs er hið sama og bæjarstjórnar. Auk kjörinna fulltrúa eiga bæjarstjóri og yfirmaður velferðarsviðs, rétt til fundarsetu með málfrelsi og tillögurétti. Þá er heimilt að kalla til á fundi nefndarinnar sérhvern þann er tengist málum sem fjallað er um hverju sinni. Starfsmönnum stofnana bæjarins er skylt að sitja fundi nefndarinnar sé þess óskað

#### **Hlutverk og verksvið**

Megin hlutverk fjölmenningarráðs er að móta stefnu í fjölmenningarmálum sveitarfélagsins og fylgjast með framkvæmd laga og reglugerða er snerta starfssvið ráðsins. Ráðið skal stuðla að hvers konar upplýsingagjöf og samstarfi Sveitarfélagsins Hornafjarðar við hagsmunasamtök hópsins, vinna að stefnumótun og gera tillögur til bæjarráðs sem varðar verksvið þess. Megin markmið ráðsins er að koma málefnum innflytjenda í sveitarfélaginu á framfæri, skapa vettvang til samskipta og stuðla að fjölmenningarlegu samfélagi.

Meðal verkefna fjölmenningarráðs er eftirfarandi:

- ◆ Að gera tillögu til velferðarnefndar og bæjarstjórnar um markmið og stefnu sveitarfélagsins í málefnum nýrra íbúa.
- ◆ Að hafa eftirlit með því að samþykkt markmið bæjarstjórnar í málaflokknum nái fram að ganga.
- ◆ Að vera bæjarstjórn, nefndum og ráðum og teyimum Sveitarfélagsins Hornafjarðar til ráðgjafar um málefni og hagsmuni íbúa sem eru innflytjendur.
- ◆ Fjölmenningarráð er vettvangur samráðs bæjarbúa sem eru innflytjendur, félagasamtaka, atvinnulífs og bæjaryfirvalda.
- ◆ Að stuðla að kynningu þjónustu stofnana sveitarfélagsins og eflingu félagsauðs.
- ◆ Fjölmenningarráð er verkefnisstjóra fjölmenningar og Menningarmiðstöðvar Hornafjarðar til ráðgjafar og aðstoðar varðandi viðburði tengdum

fjölmenningu og stuðla að auknum sýnileika innflytjenda í öðrum viðburðum sem haldnir eru í sveitarfélaginu.

### **Starfshættir**

Um starfshætti undirnefnda og ráða bæjarstjórnar Sveitarfélagsins Hornafjarðar er fjallað í VI. kafla í *samþykkt um stjórn og fundarsköp Sveitarfélagsins Hornafjarðar*.

Fjölmeningarráð kemur saman á fastákveðnum fundartíma annan hvorn mánuð, formaður stýrir fundi. Skal gerð samþykkt um þennan fundartíma á fyrsta fundi ráðsins að fenginni tillögu bæjarstjóra. Boðað skal til aukafunda að ákvörðun formanns eða ef a.m.k. tveir ráðsmanna óska þess. Heimilt er að fella niður fundi að sumarlagi og á öðrum tímum að mati formanns. Ráðið getur auglýst einstaka fundi sína opna, en verður annars að samþykkja viðveru hvers þess, sem ekki á seturétt á fundinum.

Þá getur ráðið staðið fyrir kynningarfundum vegna starfa sinna eða þeirra verkefna sem til umfjöllunar eru, og skulu slíkir fundir öllum opnir.

Starfsmaður ráðsins sér um að taka á móti erindum og málum sem leggja á fyrir nefndina. Hann útbýr í samráði við formann skriflegt eða rafrænt fundarboð þar sem tilgreindur er fundarstaður og fundartími og dagskrá í tölusettum liðum. Fundarboð skal sent öllum aðalmönnum, varamönnum og öðrum sem seturétt eiga á fundum ráðsins. Starfsmaður kemur undirritaðri fundargerð til starfsmanna stjórnsýslu sem sjá um að fundargerð sé tekin á dagskrá næsta fundar bæjarráðs sveitarfélagsins.

Ályktanir til bæjarstjórnar og bæjarráðs skulu ætíð sendar bæjarstjóra í sérstöku erindi sem starfsmaður nefndarinnar útbýr.

Ráðsmenn skulu fá hæfilega þóknun úr bæjarsjóði fyrir störf sín samkvæmt nánari ákvörðun bæjarstjórnar og njóta fræðslu og stuðnings, þ.m.t. tülkaþjónustu eftir því sem þörf er á.

### **Eftirfylgni**

Velferðarnefnd og starfsmaður ráðsins bera ábyrgð á framkvæmd þeirrar stefnu sem mótuð hefur verið á hverjum tíma varðandi málefni fjölmenningar. Formaður og aðrir fulltrúar fjölmeningarráðs skulu snúa sér til bæjarstjóra til að fylgja eftir þeim ákvörðunum og samþykktum sem ekki eru alfarið á verksviði ráðsins að framfylgja.

### **Réttindi og skyldur ráðsmanna**

Um réttindi og skyldur ráðsmanna gilda ákvæði *sveitarstjórnarlaga* og *samþykkt um stjórn og fundarsköp Sveitarfélagsins Hornafjarðar*. Fundarmenn eru bundnir þagnarskyldu, þagnarskylda helst þó látið sé af störfum. Um hæfi ráðsmanna í fjölmeningarráði gilda ákvæði 19. gr. *sveitarstjórnarlaga* nr. 45/1998. Um hæfi starfsmanna gildir II. kafla *stjórnsýslulaga* nr. 37/1993.

### **Lög og reglugerðir**

Í störfum sínum skal fjölmeningarráði taka mið af þeim lögum og reglugerðum sem snerta starfssvið hennar. Þá skal ráðið fylgja *samþykkt um stjórn og fundarsköp Sveitarfélagsins Hornafjarðar*.

*Samþykkt í bæjarstjórn Sveitarfélagsins Hornafjarðar 15. apríl 2021.*

*Matthildur Ásmundardóttir bæjarstjóri*